

西方願文解

西方願文科

*大文分二

初總序歸敬三

初標主

二明願

三請加

二正述願文三

初求生西方正因五

初發起大心

二懺悔業障

三立願自要

四求佛冥加

五淨業成就

二得生西方明驗三

初臨終正念

二感佛來迎

三往生極樂

三已生淨土大用四

初見佛得記

二蒙記具德

三成德利生

四普皆回向

西方願文解

淨業弟子 祿宏 著并釋

△初總序歸敬三 初標主。二明願。三請加。 初標主。

稽首西方安樂國 接引眾生大導師

稽首者。以首叩地。敬之至也。西方國土無量。今歸敬者。西方之安樂國也。安樂。極樂之異名也。或名安養。或名清泰。其義一也。接，攝取也。引，指導也。眾生沉淪。接取置之善地。眾生迷昧。指導歸之正途。凡知識羅漢菩薩如來皆接引。導師。如收獵

之有虞人。涉川之有舟長。問路之有土民也。惟佛為群導師之中大導師也。大，二意。一普度群靈無遺失故。二究竟成佛無退轉故。

△二明願。

我今發願願往生

信行願三。淨土資糧。但言願者。惟信故願。願之切者。必其信之真也。行以願立。願之切者。自能行之力也。是以彌陀經中專說發願願往。不一而足。

△三請加。

惟願慈悲哀攝受

願文備矣。或問：古云把手牽他行不得。惟人自肯乃相應。何乃求佛攝受耶？答：一者彌陀本願力故。二者求佛攝受。正自肯故。三者感應道交。正相應故。（何乃下。三十六字未完今續）。

△二正述願文分三。初求生西方正因。二得生西方明驗。三已生淨土大用。初求生西方正因五。初發起大心。二懺除業障。三立願自要。四求佛冥加。五淨業成就。初發起大心。

弟子(某甲眾等)普為四恩三有，法界眾生。求於諸佛一乘無上菩提道故。專心持念阿彌陀佛萬德洪名。期生淨土。

先出念佛求生淨土之本志也。普為者。兼利為懷。不為自身獨求解脫也。一乘者。佛果為期。不於餘乘妄有希冀也。發如是心乃修淨土。是謂正因。苟為不然。雖勤念佛。因地不真。果招迂曲。○四恩者。在家，則父母、眾生、國王、三寶。出家，則父母、師長、國王、施主也。三有者，欲有、色有、無色有也。

△二懺除業障。

又以業重福輕。障深慧淺。染心易熾。淨德難成。今於佛前。翹勤五體。披瀝一心。投誠懺悔。我及眾生。曠劫至今。迷本淨心。縱貪瞋痴。染穢三業。無量無邊。所作罪垢。無量無邊。所結冤業。願悉消滅。

承上雖發大心。恐宿世今生業障多而福慧少。欲淨偏染。故須懺悔。本淨者。心本自淨。因迷成染。今始覺知慚愧脩省。若本不淨。如銷頑鐵。欲成真金。縱經百鍊。終不成就○三業者。身業、意業、口業也。三業各具貪瞋痴故。

△三立願自要。

從於今日。立深誓願。遠離惡法。誓不更造。勤修聖道。誓不退惰。誓成正覺。誓度眾生。

雖已懺悔。不發誓願。是謂有懺無悔。要者。猶俗云脅制。古曰要君。今自要故。四句即四弘誓也○遠離句。即煩惱無盡誓願斷也。勤修句。即法門無量誓願學也。誓成句。即佛道無上誓願成也。誓度句。即眾生無邊誓願度也。

△四求佛冥加。

阿彌陀佛以慈悲願力。當證知我。當哀憫我。當加被我。願禪觀之中。夢寐之際。得見阿彌陀佛金色之身。得歷阿彌陀佛寶嚴之土。得蒙阿彌陀佛甘露灌頂。光明照身。手摩我頭。衣覆我體。

古淨土文謂佛以天眼遙觀。天耳遙聞。他心速見故。行人既發大心。佛必證知。既證知已。佛大慈悲。必垂哀憫。既哀憫已。佛大威神。必垂加被。顯如禪觀。幽如夢寐。所云金色、寶嚴、甘露、光明、手摩、衣覆精誠之極。感應自然。或不精誠與精誠未極。則不能也。然行人但須一心精誠。不必因此生著。作意求現。

△五淨業成就。

使我宿障自除。善根增長。疾空煩惱。頓破無明。圓覺妙心。廓然開悟。寂光真境常得現前。

既以自力。又蒙佛力。內外交資。故障滅善生。有如是等大利益事。空而曰疾。不勞肯綮修證也。破而曰頓。不歷階級次第也。了悟圓覺。常住寂光。至是得本淨心。故曰淨業成就○宿障者。貪嗔痴等。善根者。戒定慧等。妙心真境。言之似分。實則即心即境。即境即心。二而不二。

△二得生西方明驗三。初臨終正念。二感佛來迎。三往生極樂。 初臨終正念。

至於臨欲命終。預知時至。身無一切病苦厄難。心無一切貪戀迷惑。諸根悅豫。正念分明。捨報安詳。如入禪定。

至於者。前修淨因。故至臨終感斯淨報也。平日散心雜念。臨行揮霍悵惶。念佛若至一心。臨終安得定。然行人但貴已離貪戀迷惑。勿慮或遭病苦厄難。倘遭病厄。當

知念佛人死此往生。如脫敝衣。得換珍服。如出牢獄。得還故家。不亦樂乎。況古云還有不病者麼。則亦有不厄者。復何慮哉○病苦者。身所生。厄難者。身所遇。貪戀者。或貪眷屬或貪財產不能捨故。迷惑者。心念顛倒。如不知地獄。而曰我欲往中。我欲往中故。

△二感佛來迎。

阿彌陀佛與觀音勢至。諸聖賢眾。放光接引。垂手提攜。樓閣幢幡。異香天樂。西方聖境昭示目前。令諸眾生見者聞者。歡喜感歎。發菩提心。

經云：執持名號。一心不亂。其人臨命終時。阿彌陀佛與諸聖眾。現在其前是也。眾見、發心則自他兼利矣。又眾人皆見。其事乃真。獨己見之。或是魔事。

△三往生極樂。

我於爾時乘金剛臺。隨從佛後。如彈指頃。生極樂國。七寶池內。勝蓮華中。

上見佛來。今隨佛去。無來去中而來去也。勝蓮花者。上上品也。

△三已生淨土大用四。初見佛得記。二蒙記具德。三成德利生。四普皆回向。 初見佛得記。

華開見佛。見諸菩薩。聞妙法音。獲無生忍。於須臾間。承事諸佛。親蒙授記。

上言平日求生。臨終得生。然豈徒得生而已乎。今言得生之後。親蒙佛記。具足功德。廣度眾生。有如是等大用也。凡生西方者。花開有遲速。見佛有早晚。悟道有先後。今是舉念即生。生已即花開。即見佛、即聞法、即得忍、即授記也。皆上上品事。

△二蒙記具德。

得授記已。三身四智。五眼六通。無量百千陀羅尼門。一切功德皆悉成就。

或疑如是廣大功德累劫修習未必能得。云何一生西方皆悉成就？不知萬法唯心。既得一心。何法不得！文殊般若。稱念佛為一行三昧。得此三昧。所有多聞智慧辯才。遠過阿難百千萬億倍。餘可知矣○三身者。法報化身也。四智者。大圓鏡、平等性、妙觀察、成所作智也。五眼者。肉眼、天眼、慧眼、法眼、佛眼也。六通者。天眼、天耳、他心、宿命、神足、漏盡通也。陀羅尼者。此云總持。

△三成德利生。

然後不違安養。回入娑婆。分身無數徧十方刹。以不可思議自在神力。種種方便度脫眾生。咸令離染。還得淨心。同生西方。入不退地。如是大願。世界無盡。眾生無盡。業及煩惱。一切無盡。我願無盡。

然後者。古所謂：既生西方得無生忍已。還來此世救苦眾生也。不違而入者。常居九品。常在十方。時時堪忍度眾生。刻刻西方入正定也。還得淨心者。上言迷本淨心。此言昔迷今悟。如久失方得。得其本有之淨心。非新得也。願無盡者。前來發起無上大心。故今成滿無盡大願也。

△四普皆回向。

願今禮佛、發願、修持功德。回施有情。四恩總報。三有齊資。法界眾生。同圓種智。

初始發心求生淨土。本為四恩三有法界眾生。故今回向亦如是。
西方願文解(終)

原刻西方願文跋

余自癸卯抄秋。獲侍 慈顏。說此願文。開我迷雲。嘗訊金剛何以一切盡掃。師曰。說無、無所不無。說有、無所不有。言下頓覺有省。又訊應無所住而生其心。師云。此有作一句讀者。有作兩句讀者。於義皆通。又為我旁引曲喻。豁般若一部之全旨。亶甫知嚮往。倚 師為無量壽。而遽爾示寂。不勝哀悼。金容雖杳。金口常宣。刻此願文。以志皈依之始因。願與盡未來際學人見聞隨喜者。念念無量壽覺。一心不亂。皆入雲棲大誓海者。

雲棲大師像贊附

禪之髓。儒之通。律之虎。教之龍。一行三昧折攝為宗。莊嚴萬善權實參同。且道參同何處響。咦。水底月為天上月。谷中風作隴頭風。

昔端木氏之於儒童菩薩也。日以予言贊夫子。猶以兩手捧土加泰山也。亶於 大師。猶以一指拈微塵。颺妙高山上。聊以寄其跂仰之忱云爾。

萬曆四十三年孟冬日弟子廣亶和南述